

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"E ao to tei mâ te aau; e ite hoi ratou i te Atua."
Mataio 5: 8.

Nu. 10.

10 Tiurai, 1911.

Mat. 4.

Te Fenua Tiaraa Miero i te Oire ra o Inidipenideni, i Missouri, Amerika.

I TE avae ra o Febuare ua papai mai Toae i te tahi leta,
na ô maira:

"Teie te tahi parau iti, hinaaro vau ia faaite papu mai oe i te huru, no te hoê parau, tei haapararehia mai na roto i te vea Sanito, oia hoi, te parau no te fenua tei haamaitahia e Iosepha. Te parau nei ratou e, tei ia ratou taua fenua ra. Faaite papu mai oe. Eaha to te Ekalesia Utaha mana'o i taua vahi ra, e e riro mau taua fenua ra ia vai? e o vai mau tei faaea i reira i teie nei?"

Teie te uiraa rahi tei titauhia e Toae, oia hoi: "Te parau no te fenua tei haamaitahia e Iosepha." Eaha te fenua ta Iosepha i haamaitai? Teie ia, mai te papaihia B. F. S. 57: 1. "Inaha, i te vahi i parauhia i teie nei ia Inidipenideni, o ropu mau ia, e te vahi no te hiero tei te pae ia i te tooa o te râ, tei te hoê vahi aore i atea ê atu i te fare haavaraa." Eaha te mahana i haamaitahia'i taua fenua ra e Iosepha? E o vai ma hoi te mau taeae o tei putuputu i reira a haamaitai atu ai Iosepha i taua vahi ra? Tei te 3 no Atete, i te matahiti 1831, te mahana ia ta Iosepha i haamaitai i taua fenua tiaraa hiero ra. E teie hoi te i'oa o te mau taeae tei putuputu i reira, oia hoi, o Sidine Rititoni, e Eduata Paterita, e Viliamu W. Phelepe, e Olive Taudere, e Maratini Hareti, e o Iosepha Coe.

Te fenua Tiona, o Missouri ia e rahi noa'tu, mai ta

Iosepha (metua) i haapii mai i te ekalesia i te amuiraa Eperera i te matahiti 1844, i te oire ra o Navu. Na ô mairaa oia: "O te fenua taatoa no Amerika o Tiona iho â ia, mai te apatoerau e tae noa'tu i te apatoa." (Fetia Mileni-uma, Buka 23: api 280.) B. F. S. 57: 1. Na Sidine Riti-toni taua fenua ra o Tiona i haamaitai, ei haaputuputuraa no te Feia Mo'a, i te 2 no Atete, i te matahiti 1831. Ei te vahi o tei parauhia ra o Ka Tonisipi (Kaw Township) i Mi-souri, 12 maile i te pae tooa o terâ mai te oire ra o Inidipenideni'tu te vahi mau ta'na i pure. E ere ta Iosepha i haamai-tai i taua fenua ra. Teie ta Iosepha i haamaitai o te vahi no te tiaraa o te hiero i te oire ra o Inidipenideni. I te matahiti 1831 ua hoo te Ekalesia i te tahi fenua i te oire Inidi-penideni, i Misouri. Teie te rahi o taua fenua ra, oia hoi, 63 ekerā (acres). (Eiaha mai ta'u i papai atu ia Toae 63 tâ fenua, i reira ua mana'o a'era vau e, o te tâ fenua e te ekerā fenua hoê â faito i te rahi, aita râ.) E tei roto i taua na ekerā fenua 63 ra te tahi vahi o tei faataahia, oia hoi 10 ekerā, e tei roto i taua na ekerā 10 ra, te vahi ta Iosepha i haamaitai, ei tiaraa mau no te hiero. I te matahiti 1833, ua tiahi-ê-hia te Feia Mo'a e te enemī, e ua vai noa taua fenua ra e tae noa'tu i te matahiti 1870, ei reira ua riro taua fenua ra i te tahi totaiete hoo fenua. E i muri a'e ua hoo te Herekai i te tahi maa fenua no roto i te 63 ekerā, e tei roto i te reira maa fenua te vahi i haamaitaihia e Iosepha, ei tiaraa no te hiero.

I te 3 no Me, 1911, ua papai mai o Fareea a Fareea i te tahi leta ia Ioane Me, e ua faaite mai te parau apî i Taka-roa, oia hoi:

"Ua papai mai Viliamu i te hoê leta i ô nei, ua riro te hoê tufaa Inidi-penideni i te Momoni, 12 tâ tei a ratou ia, e 8 tâ tei a tatou ia, e te vai ra e 8 tâ i roto i te rima o te Herekai, tei reira te vahi i haamaitaihia, teie te tumu ua horo faahou hia e te Herekai i te haavaraa teitei no te hau Ame-rika. E ua faaerehia Iosepha Tamaiti, e ua riro i te Herekai te fenua e 8 tâ mai tei faaitehia i nia nei, no reira, a faaite papu mai oe i te huru no taua fenua ra ia Inidipenideni; mai te mea e ua riro mau i te Momoni, a faaite mai oe; mai te mea hoi e tei a tatou ra, a faaite mai ia."

I muri a'e i te hooraahia o taua fenua tiaraa hiero ra e te Herekai, ua parau te ekalesia Sanito o ratou te fatu no taua fenua tiaraa hiero ra, e ua horo ratou i te ture, ia faa-erehia te Herekai, manuia a'era. Horo atura te Herekai i

te haavaraa teitei a'e, faaerehia'tura Iosepha (tamaiti) ma. Teie nà uiraa rahi i uihia mai e Fareea ma ia Ioane; oia hoi: 1. Te vai nei anei i teie nei â i roto i te rima o te Herekai te fenua tiaraa mau no te hiero ta Iosepha (metua) i haamaitai? 2. Ua faaere-mau-hia anei Iosepha (tamaiti)? Aore râ o Ioane i haamaramarama noa'tu i to'na tau taeae i taua na vahi i anihia maira. Ua faaite'tu râ oia i te mau parau aore i uihia mai. No reira, te faaitehia'tu nei e Te Heheuraa Apî i taua na vahi i uihia ra. 1. E, te vai maite râ taua fenua tiaraa hiero i haamaitaihia e Iosepha (metua) i roto i te rima o te Herekai e tae roa'e nei i teie nei â mahana. 2. E, ua faaere-roa-hia o Iosepha (tamaiti), e ua ere roa oia i teie nei â mahana. Teie te hoê parau mauruuru rahi tei papaihia e Ioane, oia hoi: "Ua titau te Momoni ia hoo i te tufaa no te Herekai, aore â râ ratou i manuïa." Eaha, ua hape anei te Feia Mo'a i mua i te aro o te Atua no te mea ua haapao ratou i ta'na faaueraa ra, o tei na ôraa mai e: "No reira, te tia nei ia'u i te Fatu ia hoo outou i te fenua, ia upootia outou i to te fenua nei, ia faufaahia ta outou i te ao nei, eiaha ia faatupuhia to ratou riri, no reira, e ore te fenua i Tiona e noaa maori râ ia na roto i te hoo." B. F. S. 63: 8. E te faaite mai nei Ioane e, ua titau te Momoni ia hoo i te fenua no te Herekai. Eaha, ua faaite mai anei oia e, ua titau te Sanito e hoo te fenua a te Herekai? Aita roa ia. Eaha ta te Sanito ravea e noaa'i i taua fenua ra o te Herekai? Teie ia, ua imihia e ratou te hoê ravea paari, e ua horo ratou i te ture, ia noaa taua fenua nounou-rahia e ratou ra, e ia faaere-roa-hia te Herekai i to ratou iho fenua mau, tei hoo-mau-hia e ratou. I roto i taua ravea ra ua faahapa te Ekalesia Sanito i te faaueraa a te Atua o tei na ôraa mai e: "E ore te fenua i Tiona e noaa maori râ ia na roto i te hoo." E homa e, teihea te ekalesia o na ekalesia e piti nei i tiahia i mua i te aro o te Atua? Te ekalesia o tei titau ia noaa taua fenua ra na roto i te hoo, mai te faauehia e te Atua, e aore râ, te ekalesia o tei titau ia noaa taua fenua ra na roto i te hororaa i te ture, e te haru noa? Te na ô atoa nei Ioane e: "E te faaite mai nei te Momoni e ua riro te fenua i haamaitaihia i te Herekai, mai te mea ra e, aore i toe mai te hoê vahi no taua fenua i haamaitaihia ra i roto i te rima no te ekalesia i Faaapîhia. E hape roa tei

reira mana'o. Tei ia matou nei te tahi pae o taua fenua mau ra o tei haamaitaihia e Iosepha (metua). E mea navai hoi tei reira ei tiaraa hiero." Mai te mea e parau mau tei reira, eaha te tumu i imi ai ratou i te ravea ia faaerehia te Herekai i to ratou iho fenua mau? No te ravai anei? E ere, no te mea râ, aore ia ratou te vahi mau i haamaitaihia e Iosepha ei tiaraa hiero. Na roto i te reira ravea, ua faahapa te Ekalesia Sanito i na faaueraa e piti a te Atua; oia hoi: 1. "Eiaha roa oe e nounou i to vetahi ê ra." 2. "E ore te fenua i Tiona e noaa maori râ ia na roto i te hoo." Rahi roa'tura to ratou hape, no te mea te parau nei ratou, "Tei ia matou nei te tahi pae o taua fenua mau ra o tei haamaitaihia e Iosepha (metua). E mea navai hoi te reira ei tiaraa hiero." Mai te mea ua navai, eaha ratou i nounou ai i te vahi toe? Aita paha i navai, no reira, ua imi ratou i te ravea ia faaerehia te Herekai i te fenua tiaraa mau no te hiero, ia riro tei reira fenua ia ratou. Te faaite nei te "Orometua" e: "E mau taata veve ana'e to te Herekai, e no reira, i tauturu atu ai te Ekalesia i Faaapîhia ia ratou i te taauaraa i to ratou tufaa ia ore ia riro tei reira ia vetahi ê no to ratou veve." Uiraa: Inafea te Ekalesia Sanito i te tautururaa'tu i te feia rii veve o te Herekai, o mua a'e anei i te tamataraa i te haru i to ratou fenua na roto i te hororaa i te ture, e aore râ, na muri i te iteraa papu ratou e, ua faaerehia ratou? A hi'o na tatou i te huru o taua aroha ra. Ua tauturuhia te feia rii veve o te Herekai e te Sanito i te taauaraa i to ratou fenua, ia ore ia riro ia vetahi ê. E homa e, aita'tu ia feia aroha. Aue hoi e! Aita paha te reira huru aroha i faitohia i roto i te ao atoa nei. Te faaite mai nei te "Orometua" e fenua rahi to ratou i Inidipenideni, e te parau atoa nei e, ua tausani ta ratou tâ fenua i roto i te titi ra o Inidipenideni. Eaha ta matou i reira, aita matou e peapea e hoê iti a'e i te reira, no te mea, o te fenua Missouri o Tiona ia. E e fenua rahi roa to reira, aore i riro i te Sanito, tei ia vetahi ê ra mau fatu. Ua hoo a'enei te ekalesia i te fenua i reira, e e hoo faahou â. Na ô maira te "Orometua": "E te faaite haere nei te mau orometua Moni e ia heheu mai te Atua i te hoê faaueraa ia patuhia te hoê hiero i Inidipenideni, ei reira ratou e hamani ai. Eaha ra ratou e tia'i ia na reira." Eaha e ore e tia'i ia

matou ia na reira, no te mea ua mataro matou i te paturaa i te hiero, e te vai nei na hiero nehenehe roa tei oti i te patuhia e matou i te Atua, e te vai noa ra to matou mana'o ia rave faahou â matou i taua ohipa ra i te tau a muri nei. E na roto i taua ohipa ra ua haapao maite matou i te faaueraa ra a te Atua, i te na ôraa e: "E ua faataahia e te oroa no ta'u fare mo'a, o tei faauehia to'u ra mau taata i te mau tau atoa ia patuhia i to'u ra i'oa mo'a." B. F. S. 107:12. Eaha, ua oti anei te hoê hiero i te patuhia e te rima Sanito? Aore roa ia. Aita roa to ratou rima i faatiaia noa'tu i te hoê ofai, ei paturaa hiero. E te faahapa mai nei â ratou ia matou no te mau hiero nehenehe roa ra o tei patuhia e matou. Eaha, e ere anei e huru maitai ae na hiero hanahana rahi e 4 ra, i te aore? Te tupu noa nei â te Ekalesia i te rahiraa, e te ruperupe hoi. Te faarahihia ra to'na mau otia, e te tupu noa nei â i te mau fenua e rave rahi. Te faaetaetana-hia nei to'na ra mau titi. E taua ekalesia nei, o te basileia ia ta Daniela i tohu maira, o te ore roa e mou, e ore roa hoi e riro ia vetahi ê, e vai tera e a muri noa'tu. Daniela 2: 44.—VILIAMU SETEMILA.

Te Parau Tuatapapa no Iosepha Semita.

(TUATIRAA.)

PENE X.

MATAHITI 1830.

Te faatiaraahia o te ekalesia i te tau hopea nei. E te farii-raahia o Iosepha ei aratai no te ekalesia. E te noaa ra o te Varua Maitai na roto i te tuuraa rima. E to Iosepha tiavaruraa'tu i te diabololo no roto ia Nuela Naita. E te amuiraa matamua no te ekalesia.

I TE 6 no Eperera i te matahiti 1830, i te utuafare o Petero Vitima, i te oire Faete, i te mataeinaa ra o Seneca, i te tufaa fenua rahi ra o Niu Ioka, i Amerika, o te vahi ia ifaatiatiahi'i, te Ekalesia a Iesu Mesia i te Feia Mo'a i te Mau Mahana Hopea Nei. Tooono taata i te faatiaraahia o te

ekalesia ra, e teie hoi to ratou ra mau i'oa, oia hoi, o Iosepha Semita iti, e Olive Taudere, e Haeramu Semita, e Petero Vitima iti, e Samuela Semita, e o Davida Vitima. Ua faaorehia te hara a taua na taata tooono ra i to ratou baptizoraahia hou ratou i amuihia'i ei faatia i te ekalesia, no reira, ua tia roa ia rave ratou i taua ohipa mo'a ra. Ua haamatahia te apooraa ma te pure. E i muri iho ua farii-hia Iosepha raua o Olive Taudere e te mau taeae ei na orometua haapii i te pae varua no ratou. Muri iho ua tuu ihora Iosepha i to'na pue rima i nia iho i te upoo o Olive Taudere, e ua faatoroa ia'na ei peresibutero, e ia oti te reira, ua faatoroa atoa'tu Olive ia Iosepha ei peresibutero. E i reira ua faatia raua i te oroa a te Fatu. Ua tuu atura Iosepha raua o Olive i to raua pue rima i nia iho i te upoo o te mau taeae no te faariroraa ia ratou ei melo i roto i te ekalesia, e no te horoaraa'tu i te varua, e i reira ua haere maira te Varua Maitai i nia iho ia ratou, e ua haamaramaramahia to ratou aau, e ua tohu ihora te tahi pae, e oaoa ihora ratou atoa ma te haamaitai'tu i te Atua. I reira i horoahia mai ai te tahi heheuraa ia Iosepha, o tei parauhia e te Atua ei peresibutero matamua, e ei aratai hoi no teie nei ekalesia, e o Olive atoa o tei parau-atoa-hia e te Atua ei piti no te peresibutero, e ei a'o haere i te evanelia. E ua faauehia te mau melo ia au raro ratou ia Iosepha e tia'i. Ua faaue mai te varua ia Iosepha raua o Olive ia maiti i e toofanu pue melo, e ia faatoroa ia ratou i vetahi a'e mau toroa i roto i te autahu'araa. I muri a'e i te faatiaraahia o te ekalesia i te 6 no Eperera, ua baptizohia Maratini Hareti, e Iosepha Semita, e o Lute Semita (na metua no Iosepha). E i te Sabati i muri a'e, oia hoi, te 11 no Eperera, ua haapaohia e ratou te tahi pureraa i te fare o Petero Vitima, e e rave rahi te taata tei tae i taua pureraa ra. E o Olive Taudere te orometua tei a'o, e te a'oraa evanelia matamua te reira i roto i te ekalesia i te tau hopea nei. E ia oti a'era te pureraa ua ani maira na taata tooono ia baptizohia ratou, e ua baptizo Olive ia ratou i roto i te hoê pape o tei parauhia te Roto Seneca. E hoê hebedoma i muri a'e ua baptizohia na taata toohitu e a'na. Muri a'e i te reira ua haere atura Iosepha i te utuafare no Iosepha Naita, o oia te taata o tei tauturu mai ia Iosepha raua o Olive Taudere i te maa, a iriti

noa'i raua i te parau no Te Buka a Moromona. E i to Iosepha haereraa'tu ia'na ra (tei afaihia'tu e a'na te maa e tia i te vairaa, oia hoi, te evanelia mau) ua farii-maitai-hia oia e ratou. E i taua vahi ra ua haapaohia e Iosepha te tahi mau pureraa, e e rave rahi te mau taata ua haere i reira e faaroo ai te parau, putapû atura te aau o te tahi pae, e o Nuela Naita te tahi o tei na reirahia, e ua parau mai oia ia Iosepha ia haapao faahou i te pureraa, ei reira e pure ai oia. Area ia tae i te hora pureraa, mâta'u a'era oia, e ua parau atu ia Iosepha, eiaha vau e pure i te vahitaata, i te vahi moe râ vau e pure ai, ia tae atura oia i taua vahi ra, faahapa noa maira to'na aau ia'na, no te mea aore oia i pure i te vahi ta'na i parau ra e e pure. Ho'i maira oia i te utuafare, aehuehu roa a'era to'na mana'o, roohia ihora i te ma'i, e ua tono oia i ta'na vahine e tii ia Iosepha. Ia roohia'tu oia e Iosepha, inaha, ua uruhia oia e te diabololo, e te taorahia'tura i te pae fare i nia'e i te tahua, e te mana o taua diabololo ra. Ua haru Iosepha i to'na rima, ei reira ua taparu oia ia Iosepha, i te na ôraa mai e: "A tiavaru oe i teie nei demoni no roto atu ia'u." E i reira ua faaue atura Iosepha i taua demoni ra ia haere i rapae i te io'a o Iesu Mesia, reva'tura oia i rapae au. Ua parau maira Nuela ua ite oia i te diabololo i te haereraa. Muri iti a'e tarehua i hora oia i roa a'era oia i te varua o te Atua. Ia hope râ te orama, ua parau maira oia ua ite oia i te mau mea nehenehe roa i te ra'i ra o tei ore roa e tia ia faaite atu. Maere noa ihora te feia'toa i roto i taua piha ra, no te mea ua ite na ratou i te mana haapohe no Satani, e te mana faaora hoi o te Atua. E e tapao rahi te reira tei ravehia e Iosepha i te mana o te Atua, te tapao matamua teie ta Iosepha i rave i te tau hopea nei. I te 1 no Tiunu i te matahiti 1830, i te oire ra o Faete, ua haapaohia te amuiraa matamua no te Ekalesia, oaoa ana'e ihora te Feia Mo'a i reira, ninihia maira te varua o te Atua i nia iho ia ratou, e ua tohu ihora te tahi pae, e ua ite te tahi pae i te orama hanahana rahi, e ua haamaitai'tu ratou i te Atua. Ua tae mai Nuela Naita i te oire ra o Faete i na mahana rii i mua a'e i te amuiraa, e ua bapetizohia ihora e Davida Vitima. E rave rahi te mau a'oraa parau evanelia i roto i taua amuiraa, i roa a'era te Feia Mo'a i te oaoa e te maururu i te mau parau ta ratou i faaroo ra. E ua tupu te hina-

aro i roto ia ratou ia haapao maitai, e ia tapea maite â i te faaroo e tae noa'tu i te hopea ra. I te reira tau mahana ua tae maira te tahi mau taata o tei hinaaro ia bapetizohia, e ua faaue atu Iosepha ia Davida Vitima ia bapetizo ia ratou.

—VILIAMU SETEMILA.

(E tuatihia mai teie parau.)

Te Riri Maha Ore o te Varua Pohe Mae.

“U'ana rahi hoi to te taata pohe hae, e ore oia e faa-
herehere i te mahana e tahoo ai ra.” Maseli 6: 34.

I te 25 no Mati, 1911, ua afai mai te tahi taata Sanito i te hoê buka. Ua ui atura vau ia'na e, “E buka aha ia?” Ua parau maira oia e, “E buka Orometua.” Ua parau atura vau ia'na, “Homai na, ia taio au,” e horoa maira oia. Ua taio au e hope roa. Ua ite au i te mau parau i papaihia, e te mau heheuraa, e te taeraa mai o te melahi, e te mau parau haapiiraa i faatupuhia i Takume. I reira te mana'o te tupuraa, e ua haamana'o i te mau buka atoa i papaihia e ratou; te huru, e te tumu no te reira. No reira te hohora nei au i to'u nei tuaro i mana'o.

E te mau hoa no Te Heheuraa Apî e, ua riro te pohe hae o te taata ei tumu no te mau mana'o iino atoa ra, te au ore, te vahavaha noa'tu ia vetahi e, te faaino, te pari haavare e te riri maha ore.

O vai tei rave na i taua ohipa pohe hae nei? Ia riro mau oia ei tumu no taua ohipa ino ra, maori râ, o Eilela, oia hoi, te tamaiti o te poipoi, o tei parauhia ra e, o Satani.

A opua'i te Atua i te hoê taraehara no teie nei ao, e ua faataa'tura ia Iesu ei taraehara ia haere mai oia i raro nei.

Ia ite râ Eilela i te reira parau ino ino atura oia, e ua faatupu ihora oia i te tiarepuraa i te mau melahi no te ra'i, ia ore ratou ia faatura ia Iesu. Ua ite oia e, e faatura mauhia Iesu na roto i taua ohipa ra, no reira, ua tupu to'na pohe hae, e ua opua oia e faaore oia i te opuaraa mo'a a te Atua Mana Hope ra. Ia ite te Atua i te reira, hurihia maira oia i raro nei.

Ua opua faahou ihora te Atua e tonono mai ia Adamu i

roto i teie nei ao ei faatupu i ta'na ra opuaraa. Ite a'e râ Satani e, ua tae mai Adamu ma i te ô i Edene, na te Atua i tonono mai, e no te feii rahi no'na ra, ua haere atura oia e haavare ia raua, hinaaro oia e faaore i te opuaraa a te Atua. Eaha te tumu? Maori râ, te riri maha ore ta te pohe hae i faatupu, e ia vare râ raua ra, mauruuru atura Satani.

Ua faatupu ihora te Atua i te huaai no Adamu ma, fanau maira toopiti, o Kaina e Abela.

Tae a'era i te tau afairaa tusia i te Atua ra. Ua afai atura raua i te tusia. Itehia maira ta Abela, area ta Kaina aita ia i itehia mai e te Atua. Ite ihora Satani e, ua hinaaro Abela i te mau mea no te ra'i. Ua faatupu atura oia i te pohe hae i roto ia Kaina, taparahi pohe roa atura ia Abela.

Tupu maira te mau ui i te fenua nei na roto ia Kaina e Seta. Ua faatupu te diabololo i te ino i roto i te taata, ooo a'era te Atua, tairi maira ia ratou i te ua diluvi, faaora'tura ia Noa ma. Tupu atura te taata na roto ia Noa. Ua maiti te Atua i te hoê taata no'na i roto i na tamarii a Iakoba, oia hoi, Iosepha.

Ia ite Satani i te reira, ua faatupu faahou oia i te pohe hae i roto i te mana'o o to'na mau tuaana. Ua opua ratou e, e taparahi ia Iosepha. Ua faaora te Atua ia Iosepha na roto ia Iuda. Ia tupu te taata no te Atua i Aiphiti, ia hi'o a'era te diabololo i te reira, ua faatupu oia te riri i roto i te aau o te arii no Aiphiti, ia faatupu oia i te mau ture ino ei haamou i te huaai o Iseraela, oia hoi, i te mau taata na te Atua.

Te anotau i muri mai, ua maiti te Atua i te hoê arii parautia na'na, oia hoi, Davida. Ite ihora te diabololo e riro Davida ei tupuna no Iesu, ua faatupu atura oia i te pohe hae i roto ia Saula. Ua imi oia ia Davida e taparahi.

Muri mai ua maiti te Atua i te mau peropheta ei tohu, ei faaite i ta'na parau aro. Ua imi te diabololo te mau ravea e haamou ia ratou.

Muri mai, ua maiti te Atua ia Daniela ei faaite i te parau no te mau basileia, e no te taeraa mai o Iesu, e no te faatia-raa-hia o te ekalesia. Ia ite te diabololo i te reira, ua faatupu oia i te riri i roto i te mau taata no Babulonia e taparahi ratou ia Daniela ma.

Mai reira mai â, e tae roa'tu i te fanauraa mai o Iesu,

ua imi te mau Magoi i te vahi i fanau ai oia. Ia ite te diabololo e, ua fanau Iesu, ua faaitoito oia i te mana'o o Herodia ia imi oia i te ravea e pohe ai te Mesia. Ua taparahi-noahia te aiû rii i raro i Betelehemama.

Mai reira mai e tae noa'tu i to Iesu paariraa, ite papu roa ihora te diabololo e, i haere mai Iesu i faaotii te opuaraa matamua roa a te Atua, aita atura e tia ia ia faaoromai, haere roa'tura oia i mua ia Iesu, e ua ani atura ia'na e: "A tipapa oe i raro e a haamori mai ia'u." No reira, Iesu i pahono mai e: "Haere ê atu oe, e Satani." Haere ê atura Satani ma te riri rahi roa. Ua faatupu pinepine oia i te mau huru peapea e rave rahi i roto i te ati Iuda, ia taparahi ratou ia Iesu.

Mai reira mai â, e tae noa'tu i te tau i purara ai te ekalesia. Ua faatupu te diabololo i te mau ravea ei tinairaa i te ekalesia. E te hopea ihora, ua faatupu oia i te mana rahi no te hau rahi Roma. I na roto oia i te hau Roma te tama'iraa i te feia mo'a, mai tei faaite pinepinehia e Ioane i roto i te Apokalupo. Ia ho'i ra te diabololo, e ia pau te feia mo'a, mauruuru atura oia, parahi arii noa maira oia i roto i teie nei ao.

Mai reira mai â, e tae noa'tura i te tau i maiti ai te Atua i te peropheta no te tau hopea nei, oia hoi, Iosepha Semita. Ua tamata faahou te diabololo i te tinai i te ohipa a te Atua, tei opuahia e te Atua, ei maitai no te mau mahana hopea nei. Ua haapeapeahia Iosepha ma, mai Faete mai, e tae atu i Ketelani, mai reira mai, e tae noa'tu i Ilinoi, e te hopea ihora taparahi pohe roa'tura ia Iosepha ma i te fare tapearaa i Caratete. No te u'ana o te riri mâha ore o te varua pohe hae.

(E tuatihia mai teie parau.)

—◆◆◆—
 "Teie na parau e ono ra ta Iehova a riri nei, e te hitu hoi e mea faufau atoa ia na'na: 17 o te mata teitei, te arero haavare, e te rima i manii ai te toto hara ore ra; 18 o te aau i opua i te parau ino ra; e te avae e horo oioi e rave i te ino; 19 te ite haavare, e parau i te parau haavare ra, e o tei faatupu i te mârô i roto i te mau taeae ra." Maseli 6: 16-19.

Te Mau Parau Api.

TE poro atu nei Te Heheuraa Apî i to'na mau hoa Ekalesia no te mau fenua Tuamotu, ia tae ana'e mai ratou i Takume, te vahi i haapao-hia no te amuiraa i te Atopa i muri nei.

I te avae Tiunu ua peni matou i te fare parahiraa orometua i Papeete nei i te mau tore au maitai. E teie nei ua au ia ei fare apî o roto, e e mea nehenehe hoi.

Tei te oire ra o Brooklyn, i Amerika, te hoê e'aturu auri (steel) i nia iho i te hoê anavai. Hoê ahuru ma toru matahiti i te hamini-raa-hia. Teie to'na faito, 135 avae i te teitei, 3,475 avae i te roa. Ua pau 15,000,000 dara i to'na hamani-raa-hia.

Tei te hoê fare taioraa parau i Beritani, o tei parauhia "British Museum," te mau paepae vairaa buka, e toru ahuru e ma piti maile i te roa, e ua i roa i te mau buka huru rau. Mai teie te huru o taua mau paepae vairaa buka ra, mai te mea ia haapararihia e faaafaro-noa-hia te tahi i muri iho i te tahi ua roaroa ia e ua au i na maile i faaitehia i nia nei.

I na avae i mairi a'enei, ua tupu te auahi rahi i Amerika. Mea fatata hoê afa no te oire ra o Bangor tei pau. Ua tausani i te tausani-raa i te taata aita e fare. Ia parauhia e ono milioni dara (6,000,000) te moni e au no te mau mea ua pau. Ua haamata te auahi i roto i te tahi fare vairaa maa puaahorofenua, e matie mârô, e e mea ama oioi noa. Pohe atura na taata tootoru.

Ua oti a'enei te pahi tira piti ra o "France Oceanienne" o tei hamani-hia i Papeete nei, e te taata ra e B. S. Chapman tamuta pahi. No te taata ra o Mapuhi teie pahi. E pahi hamani-maitai-hia i te mau raau paari maitai, e te tino etaeta, aita e faito e te nehenehe maitai. E teie to'na faito i to'na rahiraa: 88 avae te roa o nia, 24 avae te aano, 9 avae e tiahapa te hohonu, e ua faitohia hoi to'na tane, oia hoi, 95 tane. I te 5 no teie nei avae ua faatomohia, e ua reva'tura taua pahi nei i te mau fenua Tuamotu.

Ua hamani a'enei te hau Eremania i te tahi pahi manuâ apî huru ê rahi. Aita e tira, aita e vahi ia hi'ohia'tu, maori râ, te tahua menemene auri (steel). Aita a'na haapupuraa auahi, no te mea, aore i faaterehia i te auahi, i te mata'i râ (gas). Aita i rahi to'na mau pupuhi, teie râ, e mea puai, e te haruru oioi noa ia tama'i. E au to'na puai i na puaahorofenua e ono tausani (6,000). E pahi tere roa, e noa ia'na 31 maile i te hora hoê. Te mana'o nei te taata paari ite tama'i, aore oia e ino i mairi-hia i te topita no nia mai i te pahi reva. Te imi nei â te mau hau i te ravea e ora'i ta ratou mau pahi manuâ i te hamani ino o te mau pahi reva. E teie pahi i hamani-apî-hia o te tahi ia i mana'ohia e ora i te reira huru enemi.

I te avae i mairi a'enei, ua hoohia te poe no to matou taeae o Marere a Patea no Takaroa. Teie te moni ta'na i noaa mai no taua poe ra, oia hoi, 1,400 dara, moni Farani.

Ua pau a'enei i te auahi te oire Tinito o Kirin. E te vai ra te mau taata 40,000, aita e utuafare. Ua pau i taua auahi ra na fare toa 4,000, e 15 fare moni, e 8,387 fare parahiraa, e te tahi atu â mau huru fare.

I te 6 no Tiunu, ua reva to matou taeae i te faaroo nei o Isaata i to'na ihora fenua mau. Ua tae mai oia i te avae Setepa i te matahiti 1907. E taeae herehia oia e te ekalesia taatoa nei. No reira, ua tupu to ratou aroha i te rahiraa i to'na revaraa'tu. E ohipa maitai tei oti ia'na i to'na parahiraa i ô nei.

I te 22 no Me, ua tae mai i te oire ra o Niu Ioka, Amerika, mai Aferika mai te tahi ophi o tei mairihia te i'oa ra o "Ani Rahi", e ua tuuhia oia i roto i te hoê piha hi'o, i roto i te hoê vahi parahiraa no te mau huru animala. Teie te faito o taua ophi nei, oia hoi, e 20 avae i te roa, e 150 e tiahapa kilo to'na teiaha, e to'na faito ia haaatihia i te vahi ropu,ra, e taea i te hoê metera. Na te hoê taata Amerika o R. Mole taua ophi i marei.

I te 28 no Tiunu, 1911, i te mataeinaa ra o Faaa, ua haere e toopiti pue taata e ta moemoe i te puua oviri, e i to raua taa-ê-raa, e aita i maoro rea, ua faaroo te tahi i te haruru pupuhi, mana'o a'era e, e puua tei pupuhia, horo atura oia, e inaha, o to'na iho hoa ua puta i te pupuhi ia'na iho, e aita i maoro pohe roa'era. E te io'a o taua taata i pohe nei, o Toro ia, e tane na te tamahine o Tuhiva, Tinito.

Ua tupu te tahi ati rahi i te 21 no Me i te fenua Farani. Ua putu-putu a'era e piti hanere tausani (200,000) taata ei maitatai atu i te haamataraa o te hoê faatitiauaraa pahi reva, mai Pari atu e tae atu i Madirida i Paniola. E tei roto i taua nahoa rahi taata, te tahi pūpū taata mana no te hau. Te mau noa ra te tahi pahi, e inaha, e tae oia i nia'e i te pūpū taata mana, ua ino te macini, aita ta te taata faatere e ravea ia faatere atu ia'na, ua mairi ta'ne noa oia, e ua ū i nia iho i taua pūpū taata mana ra. Pohe roa ihora te taata ra o Heneri Maurice Berteaux, taata faatere ohipa no te mau tama'i. E ua pēpē ino roa te tino o na taata tootoru. E tei roto i taua pahi ra, na taata toopiti, aore raua i ino noa'i, maori râ, te pahi ana'e, parari roa ihora.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.